

彊邨叢書



樵歌目錄

卷上

聒龍謠二

雨中花

水調歌頭六

桂枝香

水龍吟二

念奴嬌七

蘇武慢

木蘭花慢二

洞仙歌三

滿庭芳二

滿江紅

風流子

望海潮

勝勝慢

芰荷香

沁園春

卜算子慢

醉春風

蹋歌

鵲橋仙

六

臨江仙

八

鷓鴣天

十四

卷中

木蘭花

二

驀山溪

七

朝中措

十一

促拍醜奴兒

醉落魄

醉思仙

感皇恩

三

杏花天

三

戀繡衾

青玉案

南歌子

蘇幙遮

二

浪淘沙

三

千秋歲

定風波

蹋莎行

二

夢玉人引

一落索二

漁家傲三

望江南

十二時

南鄉子二

行香子

憶帝京

桃源憶故人六

好事近十四

長相思二

烏夜啼

沙塞子二

西江月八

卷下

減字木蘭花十七

點絳脣五

柳梢青六

采桑子三

憶秦娥四

卜算子七

清平樂

六

昭君怨

浣溪沙

八

阮郎歸

生查子

眼兒媚

三

訴衷情

四

菩薩蠻

五

雙鷓鴣

鼓笛令

西湖曲

風蝶令

謁金門

洛妃怨

燕歸梁

相見歡

七

如夢令

八

春曉曲

柳枝

樵歌卷上

洛陽 朱敦儒 希真

聒龍謠

肩拍洪崖手攜子晉夢裏暫辭塵宇高步層霄俯人間
如許算蝸戰多少功名問蟻聚幾回今古度銀潢展盡
參旗桂花澹月飛去天風緊玉樓斜舞萬女霓袖光
搖金縷明廷宴闕倚青冥回顧過瑤池重借雙成就楚
岫更邀巫女轉雲車指點虛無引蓬萊路

又

憑月攜簫遡空秉羽夢蹋絳霄仙去花冷街榆梢中天
風露竝眞官蕊佩芬芳望帝所紫雲容與享鈞天九奏

傳觴聽龍嘯看鸞舞
驚塵世悔平生歎萬感千恨誰
憐深素羣仙念我好人間難住
勸阿母偏與金桃教酒
星騰斟瓊醕醉歸時手授丹經
指長生路

雨中花嶺南作

故國當年得意射麋上苑走馬
長楸對蔥蔥佳氣赤縣
神州好景何曾虛過勝友是處
相留向伊川雪夜洛浦
花朝占斷狂遊胡塵卷地南走
炎荒曳裾強學應劉
空漫說螭蟠龍臥誰取封侯塞
雁年年北去蠻江日日
西流此生老矣除非春夢重到
東周

水調歌頭淮陰作

當年五陵下結客占春遊紅纓
翠帶談笑跋馬水西頭

落日經過桃葉不管插花歸去小袖挽人留換酒春壺
碧脫帽醉青樓楚雲驚隴水散兩漂流如今憔悴天
涯何處可銷憂長揖飛鴻舊月不知今夕煙水都照幾
人愁有淚看芳草無路認西州

又

白日去如箭達者惜分陰問君何苦長抱冰炭利名心
冀望封侯一品僥倖昇仙三島不死解燒金聽取百年
曲三歎有遺音會良朋逢美景酒頻斟昔人已矣松
下泉底不如今幸遇重陽佳節高處紅萸黃菊好把醉
鄉尋澹澹飛鴻沒千古共銷魂

又和董彌大中秋

偏賞中秋月從古到如今金風玉露相閒別做一般清
是處簾櫳爭卷誰家管絃不動樂世足歡情莫指關山
路空使翠蛾顰水精盤鱸魚膾點新橙鵝黃酒暖纖
手傳杯任頻斟須惜曉參橫後直到來年今夕十二數
虧盈未必來年看得似此回明

又和海鹽尉范行之

平生看明月西北有高樓如今羈旅常歎茅屋暗悲秋
聞說吳淞江上有箇垂虹亭好結友漾輕舟記得蓬萊
路端是舊曾遊趁黃鵠湖影亂海光浮絕塵勝處合
是不數白蘋洲何物陶朱張翰勸汝橙齏鱸膾交錯獻
還酬寄語梅仙道來歲肯同不

又對月有感

天宇著垂象日月共回旋因何明月偏被指點古來傳
浪語修成七寶漫說霓裳九奏阿姊最嬋娟憤激書青
奏伏願聽臣言詔六丁驅狡兔屏癡蟾移根老桂種
在歷歷白榆邊深鎖廣寒宮殿不許姮娥歌舞按次守
星躔永使無虧缺長對日團圓

又

中秋一輪月只和舊青冥都緣人意須道今夕別般明
是處登臨開宴爭看吳歌楚舞沈醉倒金尊各自心中
事悲樂幾般情燭摧花鶴警露忽三更舞茵未卷玉
繩低轉便西傾認取眼前流景試看月歸何處因甚有

虧盈我自闔門睡高枕笑浮生

桂枝香

南都病起

春寒未定是欲近清明雨斜風橫深閉朱門盡日柳搖
金井年光自趁飛花緊奈幽人雪添雙鬢謝山攜妓黃
壚貰酒舊愁慵整念壯節漂零未穩負九江風笛五
湖煙艇起舞悲歌淚眼自看清影新鶯又向愁時聽把
人閒如夢深省舊溪鶴在尋雲弄水是事休問

水龍吟

放船千里凌波去略爲吳山留顧雲屯水府濤隨神女
九江東注北客翩然壯心偏感年華將暮念伊嵩舊隱
巢由故友南柯夢遽如許回首妖氛未掃問人閒英

雄何處奇謀報國可憐無用塵昏白羽鐵鎖橫江錦帆
衝浪孫郎良苦但愁敲桂櫂悲吟梁父淚流如雨

又

曉來極目同雲暖空降雪花零亂平生塵想老來俗狀
都齊驚散玉鳳凌霄素虬橫海一杯相勸任霓裳學舞
梅妝作面終不似天裁翦正是年華美滿鬪迎春巧
飛釵燕衝寒醉眼倚空長揖羣仙笑粲說道瑤池有人
來報西真開宴便爭回蕊佩高馳羽駕卷東風轉

念奴嬌

見梅驚笑問經年何處收香藏白似語如愁卻問我何
苦紅塵久客觀裏栽桃仙家種杏到處成疏隔千林無

伴澹然獨傲霜雪 且與管領春回孤標爭肯接雄蜂
雌蝶豈是無情知受了多少淒涼風月寄驛人遙和羹
心在忍使芳塵歇東風寂寞可憐誰爲攀折

又

插天翠柳被何人推上一輪明月照我藤牀涼似水飛
入瑤臺瓊闕霧冷笙簫風輕環佩玉鎖無人掣閒雲收
盡海光天影相接 誰信有藥長生素娥新鍊就飛霜
凝雪打碎珊瑚爭似看仙桂扶疏橫絕洗盡凡心滿身
清露冷浸蕭蕭髮明朝塵世記取休向人說

又

晚涼可愛是黃昏人靜風生蘋葉誰做秋聲穿細柳初

聽寒蟬淒切旋采芙蓉重熏沈水暗裏香交徹拂開冰
簟小牀獨臥明月老來應免多情還因風景好愁腸
重結可惜良宵人不見角枕蘭衾虛設宛轉無眠起來
閒步露草時明滅銀河西去畫樓殘角鳴咽

又

老來可喜是歷徧人間諳知物外看透虛空將恨海愁
山一時按碎免被花迷不爲酒困到處惺惺地飽來覓
睡睡起逢場作戲休說古往今來乃翁心裏沒許多
般事也不斬仙不佞佛不學棲棲孔子懶共賢爭從教
他笑如此只如此雜劇打了戲衫脫與猷底

又約友中秋遊長橋魏倅邦式不預作念奴嬌和其韻

素秋天氣是登山臨水昔人悲處我遇清時無箇事好
約鶯遷鴻翥旋整蘭舟多攜芳醞笑裏輕帆舉松江纜
月望雲飛櫂延佇別乘文雅風流新詞光萬丈珠連
錦聚恨不同遊指浩渺玉宇瓊樓相付桂子收香蟾輝
采露暫輟尊前舞絲囊封寄倩他雙翠銜去

又楊子安侍郎壽

臘回春近正日添宮綫香傳梅驛玉律冰壺此際顯天
與奇才英識貫日孤忠凌雲獨志曾展回天力功名由
命等閒卻鍛鸞翮誰信夫子如今眠雲情意穩風塵
機息邂逅初心得計處伊水鷗閒波碧但恐天教經綸
緣在未遂紫煙客君王圖舊看公歸覲京國

又垂虹亭

放船縱櫂趁吳江風露平分秋色帆卷垂虹波面冷初
落蕭蕭楓葉萬頃琉璃一輪金鑑與我成三客碧空寥
廓瑞星銀漢爭白深夜悄悄魚龍靈旗收暮靄天光
相接瑩澈乾坤全放出疊玉層冰宮闕洗盡凡心相忘
塵世夢想都銷歇胸中雲海浩然猶浸明月

蘇武慢

枕海山橫陵江湖去雉堞秋風殘照閒尋桂子試聽菱
歌湖上晚來涼好幾處蘭舟采蓮遊女歸去隔花相惱
柰長安不見劉郎已老暗傷懷抱誰信得舊日風流
如今憔悴換卻五陵年少逢花倒趂遇酒堅辭常是懶

歌慵笑除奉天威掃平狂虜整頓乾坤都了共赤松攜
手重騎明月再遊蓬島

木蘭花慢

折芙蓉弄水動玉佩起秋風正柳外閒雲溪頭澹月映
帶疏鐘人閒厭謫墮久恨霓旌未返碧樓空且與時人
度日自憐懷抱誰同當時種玉五雲東露冷夜耕龍
念瑞草成畦瓊蔬未采塵染衰容誰知素心未已望清
都絳闕有無中寂寞歸來隱几夢聽帝樂沖融

又和師厚和司馬文季虜中作

指滎河峻嶽鎖胡塵幾經秋歎故苑花空春遊夢冷萬
斛堆愁簪纓散關塞阻恨難尋杏館覓瓜疇悽慘年來